

Na osnovu člana 5. tačka 8 Zakona o dopunskim pravima boraca-branitelja Bosne i Hercegovine - Novi Prečišćeni tekst ("Službene novine Kantona Sarajevo", br: 18/21) i člana 25. Statuta Općine Stari Grad Sarajevo ("Službene novine Kantona Sarajevo", broj: 20/13 - Prečišćeni tekst), Općinsko vijeće Stari Grad Sarajevo na sjednici održanoj dana 30.09.2021.godine donijelo je:

PRAVILNIK O STIPENDIRANJU DJECE BORAČKE POPULACIJE

I - OPĆE ODREDBE

Član 1.

(1) Ovim Pravilnikom se utvrđuju uslovi, postupak, sredstva i kriteriji stipendiranja učenika srednjih škola i studenata visokoškolskih ustanova (u daljem tekstu djeca boračke populacije), koji imaju prebivalište na području Općine Stari Grad Sarajevo najmanje godinu dana prije podnošenja zahtjeva.

(2) Djeca boračke populacije su: djeca umrlih, poginulih, nestalih branioca, djeca RVI kao i djeca demobilisanih branioca, dobrovoljaca, organizatora otpora, ratnih vojnih zarobljenika kao i djeca lica zaslužnih u odbrambeno - oslobodilačkom ratu i agresiji na Bosnu i Hercegovinu, (u daljem tekstu djeca boračke populacije).

Član 2.

(1) Pravo na stipendiranje djeca boračke populacije mogu ostvariti putem prijave na Javni konkurs.

(2) Pravo učešća na Javnom konkursu za stipendiranje u tekućoj školskoj godini imaju redovni učenici srednjih škola i redovni studenti čija obrazovna institucija ima sjedište na području Kantona Sarajevo.

Član 3.

(1) Odluku o raspisivanju Javnog konkursa za stipendiranje djece boračke populacije donosi Općinski načelnik svake školske godine za tekuću godinu.

(2) Javni konkurs o stipendiranju djece boračke populacije provodi Općinski načelnik putem Službe za boračko-invalidsku i socijalnu zaštitu u saradnji sa Komisijom za izbor kandidata - korisnika općinske stipendije.

Član 4.

(1) U Budžetu Općine Stari Grad Sarajevo, za svaku kalendarsku godinu se planiraju sredstva za stipendiranje djece boračke populacije.

(2) Sredstva u Budžetu Općine Stari Grad Sarajevo, koja su odobrena za stipendiranje djece boračke populacije raspoređuju se na sljedeći način: za školovanje studenata na visokoškolskim ustanovama 60%, a za školovanje učenika u srednjim školama 40% od ukupno planiranog iznosa.

(3) Ukupan broj korisnika stipendije utvrđuje se za svaku školsku godinu, zavisno od visine odobrenih sredstava u Budžetu Općine za tu namjenu.

(4) Odobrene stipendije utvrđuju se u sljedećim novčanim iznosima: za učenike u srednjim školama 80,00 KM (osamdesetkonvertibilnihmaraka), za studente u visokoškolskim ustanovama 120,00 KM (stotinudvadesetkonvertibilnihmaraka).

(5) Raspodjela sredstava iz prethodnog stava vrši se proporcijalno po godinama studija, odnosno po razredima.

II - IZBOR KANDIDATA

Član 5.

(1) Izbor kandidata prijavljenih na Javni konkurs vrši Komisija za izbor kandidata - korisnika općinske stipendije, koju imenuje Općinski načelnik, a na osnovu kriterija iz člana 10. ovog Pravilnika.

(2) U Javnom konkursu definiše se: uslovi koje kandidati moraju ispunjavati, broj kandidata koji se stipendira, rok za podnošenje prijave, period za koji se dodjeljuje stipendija, rok za podnošenja prigovora po završenom Javnom konkursu i organ kojem se podnosi prigovor. Konkurs se objavljuje u jednom od dnevnih listova, na oglasnoj ploči Općine i na službenoj stranici Općine, najkasnije do 31. oktobra za tekuću školsku godinu.

Član 6.

(1) Izbor kandidata prijavljenih na Javni konkurs vrši Općinski načelnik, na prijedlog Komisije za izbor kandidata - korisnika općinske stipendije.

(2) Komisiju za izbor kandidata - korisnika općinske stipendije imenuje Općinski načelnik posebnim rješenjem.

(3) Komisija iz stava 1. ovog člana vrši izbor prijavljenih kandidata u skladu sa kriterijima utvrđenim ovim Pravilnikom. Komisija je sastavljena od četiri člana i to: jedan predstavnik Službe za boračko-invalidsku i socijalnu zaštitu, jedan predstavnik Komisije za pitanja boraca i žrtava rata - radnog tijela Općinskog vijeća Stari Grad Sarajevo i dva predstavnika boračkih udruženja registrovanih na području Općine Stari Grad Sarajevo.

(4) Prijavljeni kandidati po Javnom konkursu će biti obaviješteni o rezultatima izbora kandidata, u roku od 15 dana od utvrđivanja Preliminarne liste stipendista koji zadovoljavaju uslove za dobijanje stipendije.

(5) Kandidati koji nisu zadovoljni rezultatima liste stipendista iz prethodnog stava mogu podnijeti prigovor Drugostepenoj stručnoj komisiji Općinskog vijeća u roku od osam dana od prijema obavještenja.

(6) Odluka Drugostepene komisije Općinskog Vijeća je konačna.

Član 7.

Sa izabranim kandidatima zaključuje se Ugovor o dodjeli stipendije, kojim se regulišu međusobna prava i obaveze ugovornih strana. Ugovor potpisuju: student/učenik koji je ostvario pravo na stipendiju, a za malodobne korisnike stipendije njihov zakonski staratelj i Općinski načelnik u ime Općine Stari Grad Sarajevo.

Član 8.

Stipendije se dodjeljuju za jednu školsku godinu i iste će se isplaćivati za devet mjeseci, koliko traje nastava u jednoj školskoj godini, a što se precizira Ugovorom o dodjeli stipendije.

Član 9.

Pravo na stipendiju ne mogu ostvariti sljedeći kandidati:

- a) čiji članovi porodičnog domaćinstva, u prethodna tri mjeseca, računajući od dana prijave na Javni konkurs imaju mjesečna primanja veća od dvije prosječne plaće isplaćene u FBiH iz prethodne godine,
- b) koji su ostvarili pravo na stipendiju u nekoj drugoj instituciji i ustanovi,
- c) iz iste porodice, koji su po osnovu ostvarenih bodova stekli pravo na dobijanje stipendije (dva ili više kandidata iz istog porodičnog domaćinstva),
- d) koji obnavljaju školsku godinu,
- e) koji su školskoj godini za koju su aplicirali za dobijanje stipendije, upisali istu godinu studija kao i prethodne godine, samo na drugoj visokoškolskoj ustanovi.
- f) preko navršениh 25 godina života,
- g) čiji najmanje jedan od roditelja nema minimalno jednu godinu u kontinuitetu provedenu u Armiji R BiH, uz konstataciju da ne postoje okolnosti utvrđene članom 36. Zakona o pravima branilaca i članova njihovih porodica.
- h) koji imaju loše vladanje.

III - KRITERIJI ZA DODJELU STIPENDIJA

Član 10.

(1) Ostvareni bodovi po osnovu rezultata u učenju

a) za učenike:

- za učenike I razreda srednje škole prosječna ocjena u devetom razredu osnovne škole, zaokružena na jednu decimalu i pomnožena sa 10 ($4,0 \times 10 = 40,0$ bodova)
- za više razrede prosječna ocjena u pethodnoj školskoj godini, zaokružena na jednu decimalu i pomnožena sa 15 ($4,0 \times 15 = 60,0$ bodova)

b) za studente:

- za studente na I godini studija prosječna ocjena u IV razredu srednje škole zaokružena na jednu decimalu i pomnožena sa 15 ($4,0 \times 15 = 60,0$ bodova)
- za studente viših godina studija, stepen Bachelora, studente za zvanje magistra, prosječna ocjena iz prethodne godine zaokružena na jednu decimalu i pomnožena sa 18 ($8,0 \times 18 = 164,0$ bodova)
- studenti tehničkih i medicinskih fakulteta ostvaruju pravo na dodatnih 10 bodova, dodato na osnovne kriterije bodovanja.

(2) Dodatni bodovi po osnovu rezultata postignutih na raznim nivoima takmičenja za studente i učenike srednjih škola na takmičenjima koje organizuje resorno Ministarstvo za obrazovanje i to:

- a) Na općinskom nivou: I mjesto tri boda, II mjesto dva boda, III mjesto jedan bod.
- b) Na kantonalnom nivou: I mjesto šest bodova, II mjesto četiri boda, III mjesto dva boda.
- c) Na federalnom nivou: I mjesto 12 bodova, II mjesto osam bodova, III mjesto četiri boda.

d) Na državnom nivou za svako osvojeno mjesto od prva tri mjesta 15 bodova.

e) Učešće na učeničkoj svjetskoj olimpijadi: 20 bodova.

(3) Dodatni bodovi po osnovu otežanih uslova života koji su nastali kao posljedica rata:

a) učenik ili student bez jednog roditelja, a koji je poginuo kao pripadnik OS R BiH (Armije BiH i MUP-a) - osam bodova,

b) učenik ili student čiji jedan od roditelja ima priznat status ratnog vojnog invalida sedam bodova,

c) učenik ili student čiji je jedan od roditelja dobitnik najvećeg ratnog priznanja ili odlikovanja - pet bodova,

d) učenik ili student čiji je jedan od roditelja kao ratni vojni invalid ili demobilisani borac umro poslije rata - pet bodova,

e) učenik ili student dijete demobilisanog borca - četiri boda.

(4) Dodatni bodovi po osnovu primanja po članu domaćinstva:

a) učenik ili student čiji članovi porodičnog domaćinstva nemaju primanja -20 bodova,

b) učenik ili student čiji članovi porodičnog domaćinstva imaju ukupna primanja do 1/4 (jedne četvrtine) iznosa prosječne plaće u Federaciji BiH, iz prethodne godine - 12 bodova,

c) učenik ili student čiji članovi porodičnog domaćinstva imaju ukupna primanja od $\frac{1}{4}$ (jedne četvrtine) do $\frac{1}{2}$ (jedne polovine) iznosa prosječne plaće u Federaciji BiH iz prethodne godine - osam bodova,

d) učenik ili student čiji članovi porodičnog domaćinstva imaju ukupna primanja od $\frac{1}{2}$ (jedne polovine) do iznosa jedne prosječne plaće u Federaciji BiH iz prethodne godine - šest bodova,

e) učenik ili student čiji članovi porodičnog domaćinstva imaju ukupna primanja od jedne do jedne i pol prosječne plaće u Federaciji BiH iz prethodne godine - četiri boda,

f) učenik ili student čiji članovi porodičnog domaćinstva imaju ukupna primanja od jedne i pol do iznosa dvije prosječne plaće u Federaciji BiH iz prethodne godine - dva boda,

g) za svakog člana porodičnog domaćinstva koji ne ostvaruje nikakve prihode – pet bodova.

(5) Članom porodičnog domaćinstva u smislu ovog Pravilnika smatra se: roditelji, braća i sestre.

Član 11.

Djeca bez oba roditelja, koji su poginuli kao pripadnici Armije R BiH, ili djeca čiji su roditelji umrli nakon agresije, a jedan ili oba su bili pripadnici Armije R BiH, imaju pravo na dodjelu stipendije bez obzira da li ispunjavaju kriterije utvrđene članom 10. ovog Pravilnika.

Član 12.

U slučaju da prijavljeni kandidati pri bodovanju imaju isti broj bodova, prednost će imati kandidat koji ima bolji prosjek ocjena, a ako imaju isti prosjek, prednost ima kandidat čija su primanja po članu porodičnog domaćinstva niža.

Član 13

Općinski načelnik ima mogućnost da iz opravdanih razloga obustavi isplate stipendija i o razlozima obustave dužan je izvjestiti Općinsko vijeće na prvoj narednoj sjednici.

IV – PRELAZNE I ZAVRŠNE ODREDBE

Član 14

Ovaj Pravilnik stupa na snagu osmog dana od dana objavljivanja u "Službenim novinama Kantona Sarajevo".

Član 15

Stupanjem na snagu ovog Pravilnika prestaje da važi Pravilnik o stipendiranju djece šehida - poginulih boraca, ratnih vojnih invalida i demobilisanih boraca ("Službene novine Kantona Sarajevo" broj 32/11 i 41/13).

PREDSJEDAVAJUĆI
OPĆINSKOG VIJEĆA STARI GRAD
SARAJEVO
dr.sci. Mirza Batalović, dipl.el. ing.

Broj: 02-45-562/21

Sarajevo; 30.09.2021.godine